

ՎԵՀԱՓԱՌ ՀԱՅՐԱՊԵՏԻ ՔԱՐՈՁԸ՝ ՄԱՅՐ ՏԱՃԱՐՈՒՄ՝ «ՏՆՏԵՍԻ ԿԻՐԱԿԻ»-ԻՆ

(15 մարտի 1998 թ.)

Մեծի Պաճոց այս կիրակին մեր Եկեղեցու մեջ ծանոթ է որպես «Տնտեսի կիրակի», որովհետև քիչ առաջ այս բնմից կարդացվեց ավետարանական մի այնպիսի Հատված Ղուկասի Ավետարանից, ուր պատմվում էր Անիրավ տնտեսի առակը: Ես այդ առակը չեմ վերլուծելու այսօր, բայց ցանկանում եմ առակի կենտրոնական դադափարը ձեր ուշադրությունը հանձնել և այդ իմաստի լույսի տակ վերակոչել և առ Աստված գոհություն մատուցել Գարեգին Պատրիարքի այն վաստակի Համար, որ ընծայեց Աստծուն մեր Եկեղեցու և մեր Հայ ժողովրդի ծառայության միջից:

Տնտես:

Ով է նա: Ով էլ որ լինի, անկախ իր պաշտոնից, դիրքից, սեռից, ամեն ինչից առաջ նա մարդ է: Եվ մարդ՝ նշանակում է տնտես: Տնտեսը այն անձն է, որ ստանձնում է մի բան անելու և հաշիվ է տալիս նրան, ումից ստացել է այդ պատասխանատվությունը: Ավետարանում մի խոսք կար, որ շատ խորունկ իմաստ ունի: Տան տերը կանչում է իր տնտեսին և ասում. «Տուր զՀամար տնտեսութեան քո» (Ղուկ. ԺԶ 2), տուր քո կյանքի պարտականություն հաշիվը: Մեզանից յուրաքանչյուրին գալու է այդ հարցումը: Այդ հարցումը մենք տալիս ենք մեզ ամեն անգամ, երբ մենք անդրադառնում ենք, թե մենք ո՞վ ենք: Հողը, որից ծնվում ենք, մե՞նք ենք ստեղծել, ո՞չ: Ժամանակը, որի մեջ ապրում ենք, մե՞նք ենք ստեղծել, ո՞չ: Նյանքը, որ ապրում ենք՝ ո՞չ, շնորհները, կարողությունները, որ բնածին ունենք, մե՞նք ենք ստեղծել, ո՞չ: Այլ՝ Աստված:

Նրա տուրքն է: Մեր պարտքն է ոչ թե տաղանդ ստեղծել, այլ տաղանդ մշակել: Հողը ոչ թե փչացնել, այլ Հողից կյանք դուրս բերել: Ժամանակը ոչ թե անիմաստ սպառել, այլ այն պետք է ի բարին օգտագործել: Մարդը Տիեզերքի մեջ տնտեսն է կյանքի Պարզեփյի, Աստուծո: Եվ նա, ով կմոռանա իր Տիրոջը, նա ինքը կփորձի դառնալ աստված, բայց արարածը չի կարող դառնալ արարիչ: Արարիչը Արարիչ է, արարածը՝ արարած, և արարածի մեծությունը իր արարչի պատկերը, տված բարիքները ապրել, արժեքնել ու բարիքի վերածելն է, իր ընտանիքի, Հասարակության, ազգի, Աստուծո Համար: Սա է այս կիրակիի օրվա խորհուրդը: Տեսեք, փակ է Մայր խորանը, որպեսզի ամեն մեկը իր Հոգու մեջ սևեռի, իր կյանքի վրա կենտրոնացնի իր միտքը:

Մեծի Պաճոց 40 օրերը ամբողջ աշխարհի եկեղեցիներում Հատուկ շրջան է, ուր մարդն իր մասին է մտածում, ոչ թե խոսում ուրիշի մասին: Բա՛վ է խոսենք ուրիշների մասին, խոսենք մեզ հետ, այս պահին, երբ մենք տնտես ենք մեր կյանքում և ոչ թե կյանքի տերը: Ո՞վ է կարողացել Հավերժացնել իր կյանքը ժամանակի մեջ: Կյանքը Հավերժական է ժամանակից վեր եղող արժեքներով: Այս մտածումներն այսօր ձեզ եմ փոխանցում Ս. Ավետարանից և մեր Հայրերի քրիստոնեական Հավատքի ուսուցումներից և ուզում եմ այս ճշմարտությունների լույսի տակ տեսնել մեր սիրելի, անմոռանալի Կ. Պոլսի Պատրիարքի Հիշատակը: Նա իր ամբողջ 70-ամյա կյանքը ապրեց իր Եկեղեցու ծառայության մեջ: Կ. Պոլսի եկեղեցասիրական, ավանդապաշտ, եկեղեցականություն կյանքի մթնոլորտում մեծացավ և ապա իր Հոգեւոր,

իմացական, աստվածաբանական կազմավորումը ստացավ Երուսաղեմի կրոնաբույր Քրիստոսակոխ այն սուրբ վայրերի մեջ, ուր մեր Հայոց Պատրիարքությունն է և հայոց վարժարանը: Նրա կայնքը արժևորվեց երեք տնտեսութեան քոռ: Եվ նա ասելու է Աստծուն. Ով Տեր, ես գործեցի երեք տնտեսութեան վանքի, վանական մթնոլորտի մեջ, Հովվական, վարչական, ծառայողական կյանքի մեջ և դաստիարակչական, կրթական ոլորտում: Նա եղավ վանքի մեջ իր սկզբնական կյանքում՝ Երուսաղեմում, ապա իր կյանքի վերջին շրջանին Կ. Պոլսո Պատրիարք լինելուց առաջ դարձյալ Երուսաղեմ գնաց և այնտեղ Պատրիարքից Հետո ամենակարևոր պաշտոնն ստանձնեց՝ որպես լուսարարապետ Սրբոց Հակոբյանց վանքի: Եկեղեցական արարողությունները, Հավաքական աղոթքը, ծիսական ավանդությունը նրա Համար ապրում էր: Ես Հիշում եմ նրան Հիսուն տարիներից ի վեր, երբ դեռ սարկավազ էր. եկեղեցական արարողությունների կարգն ու կանոնը, ապրումները նա մեծապես գնահատում էր և սիրում էր Հայոց Եկեղեցու ծեսը և ավանդությունը:

Նա գործեց Հովվական, վարչական, կազմակերպչական, ժողովրդանվեր կյանքով: Իրրե Հովիվ ԱՄՆ-ում, ապա Ավստրալիայում, ուր տարիներ շարունակ ծառայեց՝ կազմակերպելով այդ թեմը:

Նրա կյանքի երրորդ շրջանակը եղավ կրթական-դաստիարակչական գործը: Նա Կ. Պոլսի Ս. Խաչ Դպրեվանքի տեսուչը եղավ, ուսուցիչ՝ բազմաթիվ դպրոցներում: Նա իր կյանքի վերջին ութ տարիներն անցկացրեց Կ. Պոլսում միշտ արթուն, որ Հայց. Եկեղեցու իրավունքները չկապտվեն թուրքական իշխանությունաց կողմից: Քանի անգամներ նա իր ձայնը բարձրացրեց որոշ անարդարությունների նկատմամբ, որոնք գործադրվում էին թուրքական իշխանության կողմից՝ որպես ճնշում մեր Համայնքի վրա: Եվ եկեղեցիները պայծառ ու շեն պահեց իր օգնական Հոգևորականների և նաև աշխարհական նվիրյալ անդամների հետ: Ահավասիկ մի տնտեսություն: Աստված իրեն կյանք տվեց, իր ձեռնադրության շնորհիվ եկեղեցական պաշտոն տվեց և նա այդ պաշտոնը արժևորեց, իմաստավորեց, այսօր ներկայանում է Աստուծո՝ խղճի պարտքը կատարած Հոգևորականի Հանդարտ Հոգիով, և մենք չենք մոռանա նրա Հիշատակը: Եվ այսօր Հոգե-Հանգստյան արարողությամբ և Հետազային Հատուկ Հարգանքով բարձր կպահանք նրա Հիշատակը: Վերջապես նա եղավ այստեղ, մեր ազգի քրիստոնյա ծննդավայրի մեջ, ի Ս. Էջմիածին:

Նա եղավ միշտ Հավատարիմ այս Ս. Աթոռին: Այս տարի միայն երկու անգամ այցելեց՝ հակառակ իր առողջական վիճակին, և իր Հոգու մեջ զգում էր այն խորհուրդը, որ կապված է Ս. Էջմիածի և նրա Ամենայն Հայոց Կաթողիկոսության առաքելությանը:

Մենք այսօր աղոթում ենք այստեղ մեր միաբանության անդամներին և մեր բոլոր Հավատացյալ ժողովրդի հետ, որ Աստված նրա Հոգին երանական խաղաղության մեջ ընգունի: Եվ Կ. Պոլսո Պատրիարքությունը մաղթում ենք, որ լինի ամրացում, զարգացում, Հոգևոր ծառայության մեջ հառաջդիմություն՝ վասն Հոգևոր վայելման և բարիքին Թուրքիո Հայոց մեր ժողովրդին, որ այնքան կապված է Եկեղեցուն իր ամբողջ կյանքով: Աստված թող պահի կենդանի այս անբաղկատի կապը անձի, ընտանիքի և մեր մեծ ընտանիքի՝ Հայաստանյայց Առաքելական Սուրբ Եկեղեցուն, փառք Հավիտյանս Հավիտենից. ամեն: